

DOMENIE XXIX «VIE PAL AN»

Jutoris pe Liturgjie

Domenie, ai 20 di Otubar dal 2019

Preâ simpri, cence mai stufâsi e je la esortazion che il Signôr nus fâs tal vanzeli di vuê e il nestri Friûl furnît di glesiis, gleseutis e anconis des monts a lis culinis e al mâr al reste la imagine concrete di un mont sacrâl li che la tiere te preiere e jere simpri unide al cîl. Gleseutis ormai simpri plui sieradis intant che il glon de cjampane si lu sint di râr o al tâs dal dut.

Par ognun di nô e rive la domande: cheste mê vite ridusude a cori, dulà aie incjantonade la preiere? Trop la mê preiere ise il moment personâl interiôr di une anime che e respire la proprie vite a la presince e te peraule dal Signôr? Preîno ormai dome tai perdons e tai funerâi? Trop, in cjase, mame, papà e frut / frute / fruts preîno insiemi? O valie ancje par nô la conclusion dal vanzeli di vuê... cjataraiâl ancjemò la fede su la tiere?

Intant che Luche al scrif cheste pagjine, o sin tai agns 80, al cjale a lis sôs comunitâts perseguitadis, ancje un tic avilidis e parcè no? strachis di preâ parcè che il Signôr si intarde tal judâju. L'evangjelist nus fâs capî: a son situacions de vite e de glesie che si superin dome cu la preiere; dome restant in relazion di famee cul Signôr. Come che al diseve Gandhi: "Plui lis robis mi van mâl e plui o prei; plui o prei e miôr la mê vite si sclaris".

La vedue che e lambicave il judiç di un continuo e devente l'esempli di une preiere che no mole fin cuant che il judiç, il Signôr al disarà: i fasarai justizie.

Antifone di jentrade

Sal 16,6.8

Jo ti clami, Diu gno, ma tu rispuindimi.
O soi sigûr che viers di me tu slungjis lis tôs orellis.
Vuardimi, Signôr, come la lûs dal voli,
platimi te ombre des tôs alis.

Colete

Diu onipotent e eterni,
danus une volontât che si plei simpri denant di te
e di servî a la tô maiestât cu la scletece dal nestri cûr.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

Es 17,8-13

Cuant che Mosè al tignive lis mans alçadis, Israel al vinceve.

Mosè al tignive lis mans alçadis te preiere pe sopravivence dal so popul te lote mortâl cuintri di Amalec. Sopravivence che e continue ancje in zornade di vuê: baste pensâ a ce che al sta sucedint pai Curdis in Sirie in chestis zornadis.

Dome che la spirtualitât e à fate une lungje e tormentade strade: ai timps di Mosè a preavin il Diu de vuere che al veve di fruçâ i nemîs, intant che il Diu di Gjesù nus ricuarde: Furtunâts chei che a lavorin pe pâs, parcè che ur disaran fîs di Diu (Mt 5, 9).

O vin dibisugne di tancj Mosè, ma tal dialic, tal esempli, tal spirt di amôr e di pardon insegnâts e metûts in pratiche di Gjesù.

Dal libri dal Esodo

In chei dîs, i amalecits a plombarin cuintri di Israel e a combaterin a Refidim. Alore Mosè i disè a Gjosuè: «Sielziti un pôcs di oms e doman tu tachis Amalec; jo o starai insomp de culine cul baston di Diu te man». Gjosuè al fasè come che i veve dit Mosè; al jessì a combati cuintri di Amalec intant che Mosè, Aron e Cur a montavin insomp de culine. Cuant che Mosè al tignive lis mans alçadis, Israel al vinceve, e cuant che lis molave jù al vinceve Amalec. E parvie che Mosè al veve i braçsmadûrs, a cjolerin une pierre e je meterin sot. Lui si sentà parsore, biel che Aron e Cur i tignivin sù i braçs un di une bande e un di chê altre. Cussì al tigni lis mans fermis fin che il soreli nol le a mont.

Gjosuè al fruçà Amalec e la sô int a fil di spade.
Peraule di Diu.

SALM RESPONSORIÂL

dal Salm 120

O podaressin dî che culî, in chest salm, e je dute la fiducie di Mosè in preiere insomp de culine, dal bandon in Diu dai profetis, dal popul dai puars di Jahvè. Une preiere che za e sint di sedi esaudide parcè che poiade su la esperience dai intervents continuis di Diu tal moment dal pericol.

Preiere liberant, di grande fiducie e pâs.

R. Al è il Signôr il nestri jutori.

Se cjantât: Il cjant dai salms responsoriâi, p. 255.

O alci i vôi viers lis montagnis:

d'indulà mi vignaraial jutori?

Il jutori mi vignarà dal Signôr:

lui al à fat cîi e tiere. **R.**

Nol lassarà che il to pît al clopi,

che il to vuardean si inçussisi.

Ve, no si inçussis vie,

no si piert vie chel che Israel al vuarde. **R.**

Il Signôr al è la tô vuaite,

al è il Signôr la tô ombrene

ch'e sta a la tô man gjestre.

Vie pal dì no ti fasarà mâl il soreli

ni vie pe gnot la lune. **R.**

Ti vuardarà di ogni mâl il Signôr,

al vuardarà la tô vite.

Il Signôr ti vuardarà

cuant che tu partissis e cuant che tu tornis,

cumò e par simpri. **R.**

SECONDE LETURE

2 Tm 3,14-4,2

Che l'om di Diu al sedi formât ben, preparât a perfezion par ogni opare buine.

Al dîs il Signôr: Cuant che o preais, no stait a straçâ peraulis come i paians, che a crodin di jessi esaudîts dome butant fûr peraulis. No stait a diventâ compagn di lôr (Mt 6, 7-8).

L'insegnament di S. Pauli al è clâr: tal preâ, ogni Scriture, la sacre Scriture, la Bibie, e je inspirade di Diu e util par insegnâ, par cridâ, par corezi, par educâ te justizie... O vin di fermâsi e di poiâsi propit li; massime tal vanzeli; nol è propit necessari che o lin a cirî altris devozions.

De seconde letare di san Pauli apuestul a Timoteo

Benedet, tu reste fedêl a lis robis che tu âs imparadis e che tu sês convint, savint di ce personis che tu lis âs imparadis e che di frut in sù tu cognossis lis sacris Scrituris: chês a puedin dâti la sapience ch'e mene a la salvece midiant de fede in Crist Gjesù.

Di fat ogni Scriture e je ispirade di Diu e util par insegnâ, par cridâ, par corezi, par educâ te justizie, par che l'om di Diu al sedi formât ben, preparât a perfezion par ogni opare buine.

Ti sconzuri denant di Diu e di Crist Gjesù ch'al à di vignî a giudicâ i vîfs e i muarts, pe sô manifestazion e pal so ream: predicje la peraule, ten batût simpri, cuant che al è il câs e ancje cuant che nol è il câs, cîr di convinci, cride, racomande cun dute la bontât e la dutrine.

Peraule di Diu.

CJANT AL VANZELI

Sal 129,5

R. Aleluia, aleluia.

O speri, Signôr;
o spieti la sô peraule.

R. Aleluia.

VANZELI

Lc 18,1-8

Diu al fasarà justizie ai siei elets che lu clamin.

La parabule dal Signôr e continue tune domande: - E Diu no ur fasaraial justizie...; tune rispueste: - Us dîs che al spesearà...; tune provocazion: - Ma il Fi dal om, cuant che al vignarà...

Peraulis chestis, che a varessin di promovî une nestre rispueste personâl: un sclarîmi dentri di me in sinceritât, in cussience e cence premure.

Dal vanzeli seont Luche

In chê volte, Gjesù al contà ai siei dissepui une parabule par mostrâur ch'a vevin di preâ simpri, cence mai stufâsi: «Intune citât al viveve un judiç che nol veve pêl di timôr di Diu e nol veve cûr par nissun. In chê stesse citât e viveve une vedue, ch'e leve di lui e i domandave: Fasimi justizie cuintri dal gno aversari. Par un trat di timp il judiç nol volè, ma tal ultin al disè dentri di se: Seben che no ai timôr di Diu e no mi scompon par nissun, i fasarai instès justizie e cussì no vignarà a lambicâmi di un continuo». E il Signôr al zontà: «Vêso sintût ce ch'al dîs il judiç cence cussience? E Diu no ur fasaraial justizie ai siei elets che lu clamin di e gnot? Si intardaraial tal judâju? Us dîs che al spesearà a fâur justizie. Ma il Fi dal om, cuant che al vignarà, cjataraial ancjemò la fede su la tiere?».

Peraule dal Signôr.

Su lis ufiertis

Danus, Signôr, ti prein,
di cirî cun cûr libar i tiei regâi,
par che, purificâts de tô gracie,
o vignin smondeâts propit cui misteris che ti servin.
Par Crist nestri Signôr.

Antifone a la comunion

Sal 32,18-19

Il voli dal Signôr si poe sun chei che lu rispjetin,
sun chei che tal so boncûr a sperin,
par sfrancjâ de muart lis lôr vitis,
par tignîju in vite in timp di miserie.

Daspò de comunion

Il contat cu lis robis dal cîl

che nus zovi, Signôr,
par vê i tiei benefizis in cheste vite
e par jessi inluminâts su lis realtâts eternis.
Par Crist nestri Signôr.

* * *

Cjants

*Libri Hosanna, sot il titul Eucaristie: messe, benedizion eucaristiche, rîts e cjants; dal n.7 al n.62
comprendût.*

* * *

Per sperare bisogna esercitarsi ad andare oltre i propri calcoli, le proprie proiezioni e le proprie buone ragioni. Bisogna saper rischiare, mettendo da parte anche il buon senso, che spesso tenta di rinchiuderci in un futuro frutto solo di nostri piccoli calcoli. Per sperare bisogna esercitarsi ad uscire da sé, e non fidarsi troppo di se stessi, come diceva Isacco di Ninive in uno dei suoi discorsi:

“Coloro che corrono nella speranza non si riducono aa guardare i pericoli che sono per via, anzi, non sono neppure capaci di indagare su tali realtà. Ma quando sono risaliti dall’oceano, allora appaiono loro, e glorificano Dio perché sono stati custoditi in mezzo a tutte quelle tempeste e ai molti scogli che neppure conoscevano, perché non si preoccupano di prestare attenzione a simili realtà”.

Sabino Chialà, Perdono e speranza

* * *

- * *I salms e cjantadis a vegin ripuartâts cu la numerazion dal libri: Hosanna, Cjants e preieris dal popul furlan, Ed. Glesie lis mans par serviti Furlane, 2012.*
- * *Il cjant dai salms resposoriâi, Ed. Glesie Furlane, 2012.*
- * *50 corâi de cristianitât todescje voltâts par furlan, ed. Glesie Furlane, 2016.*
- * *Par domandâ chescj libris scrivêt a info@glesiefurlane.org*